



21. maj 2026

UPA2026/147

Suliffeqarfimmik kisimiillutik ingerlatsillutik namminersorlutik inuussutissarsiuteqartut Meerartaarnermut atatillugu sulinngiffeqarnermut aningaasaateqarfimmit meerartaarnermi sulinngiffeqarnermi ullormusianik pissarsisinnaassagunik, suliffeqarfimminnik unitsitsigallartussaajunnaarsillugit imaluunniit matusisinnaajunnaarsillugit Naartunermi, erninermi meeravissiarthaarnermilu sulinngiffeqartarneq pillugu Inatsisartut inatsisaata allanngortinneqarnissaanut siunnersuusiornissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq, Napaartoq Isak Petrussen demokraatit)

Siumumiit Inatsisartunut ilaasortaq Napaartoq Isak Petrussen, Demokraatit, siunnersuutaanut pingaarutilimmut qujavugut.

Siumumut tunngaviusumik pingaartuuvoq ilaqtariittut pitsaasumik inuuneqarnissap periarfissaqarnissaa – sulisuugaluaaraanni namminersorlunilu inuussutissarsiuteqaraanni apeqqutaatinnagu.

Inuiaqatigiit tamaasa pisariaqartippagut. Ilaqtariit toqqissisimasut pisariaqartippavut, aammalu inuit namminneq suliffiminnik pilersitsisinnaasut nunami tamarmi ineriartortitsinermit tapersiisussat pisariaqartippavut.

Massakkulli piumasaqaat, namminersorlutik inuussutissarsiuteqartut suliffeqarfimmik ataasiinnarmik pigineqartut erninermit atatillugu ullormusiassanik tigusinissamut suliffeqarfimmik unitsitsisariaqarnerannik imaluunniit matoorisariaqarnerannik piumasaqaateqartoq, ajornartorsiutinik erseqqissunik pilersitsivoq.

Siumup isumaqatigaa ernumassuteqartoqarmat, aaqqissuussineq killilersuisinnaasoq – erninermit atatillugu aaqqissuussinermit aammalu nammineerluni suliffeqarfimmik aallartitserusussuseqarnermut tunngatillugu.

Peqatigitillugu pingaaruteqarpoq erseqqissassallugu, erninermit atatillugu aaqqissuussineq tunngaviusumik tunngavigisamut attuumassuteqartoq: piffissami isertitaqanngiffimmi piviusumik ikiorsiisutit tiguneqartarnerat. Taanna tunngavigisaq illersortariaqarparput. Taamaattumik allannguutit pissusissamisoortumik ingerlanneqartariaqarput, naapertuilluartumik, ersarissumik akisussaassuseqartumillu.

Siumut piumassuseqarpoq namminersorlutik inuussutissarsiuteqartunut aaqqiissutissanik eqaatsunik amerlanerusunik misissuinissamut. Assersuutigalugu tassaasinnaapput aaqqissuussinerit, erninermit atatillugu killilimmik inuussutissarsiuteqarneq akuerineqarsinnaasoq, aammalu naatsorsuutitut naleqquttumik ilanngaateqartarneq ilanngullugu. Taamaaliornikkut namminersorlutik inuussutissarsiuteqartut piviusumik atugaat aammalu erninermit atatillugu aaqqissuussinerup siunertaata akornanni ataqatigiinneq pitsaanerulersinneqarsinnaavoq.

Aamma naleqquttuuvoq misissornerusariaqartoq, soq namminersorlutik inuussutissarsiuteqartut ikittuinnaat ullumikkut aaqqissuussineq atortarneraat. Maleruagassat piviusumik innuttaasunik pisinnaatitaaffiminnik atuisinnaajunnaartitsippata, tamanna ersarissumik takutitsivoq allannguisariaqartoqartoq.

Taamatut oqareerluta, Siumumut pingaaruteqarpoq allannguutissat atonerlunneqannginnissaat imaluunniit allaffissornikkut artukkiinernik annertuunik pilersitsissanngitsut. Aaqqissuussineq sulii oqitsumik aqunneqarsinnaassaaq aammalu killissarititaqarnissaa ersarissuussaaq.



Taamaattumik Siumut isumaqarpoq Naalakkersuisut siunnersuut suliareqqillugu ingerlateqqittariaqaraat aammalu periutsimik saqqummiussillutik.

namminersorlutik inuussutissarsiuteqartunut erninermut atatillugu atugassarititaasut pitsaanerulersillugit, ikiorsiissutit aammalu inuussutissarsiuteqarnerup akornanni oqimaaqatigiissumik qulakkeerinnittoq, aammalu aqqissuussineq aningaasaqarnikkut allaffissornikkullu piujuartitsinermik attassiinnartoq.

Naggataatigut Siumut erseqqissarusuppaa, politikikkut akisussaaffeqartugut sinaakkusiinissamut, ilaqutariinneq inuussutissarsiuteqarnerlu imminnut akerleriinnginnissaat qulakkiissallugu. Meerartaarsinnaaneq suliffeqarfimmillu ingerlatsisinnaaneq ataatsikkut periarfissaasariaqarpoq.

Siumuminngaanniik naggataagut siunnersuutigerusupparput imm.169 issaannannguaq eqqartorneqartumut pulatillugu qulaajaaffigalugulu siunnersuusiorniqarnissaa, imminummi taakku ataqatigiittutut oqaatigineqarsinnaammata:

Taamaattumik allannguutissatut siunnersuuteqarusuppugut imaattumik:

“Suliffeqarfimmik kisimiillutik ingerlatsillutik namminersorlutik inuussutissarsiuteqartut aammalu aalisartut piniartullu kisimiillutik ingerlatsisutut taaneqarsinnaasut Meerartaarnermut atatillugu sulinngiffeqarnermut aningaasaateqarfimmit meerartaarnermi sulinngiffeqarnermi ullormusianik pissarsisinnaassagunik, suliffeqarfimminnik unitsitsigallartussaajunnaarsillugit imaluunnit matusisinnaajunnaarsillugit Naartunermi, erninermi meeravissartaarnermilu sulinngiffeqartarneq pillugu Inatsisartut inatsisaata allangortinneqarnissaanut UKA2027-mi saqqummiussassamik siunnersuusiornissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut.”

Taamatut oqaaseqarluta Siumut suliaq pillugu ingerlaqqinnissaa qilanaaralugu utaqquvoq.